

BRÉF**menntamálaráðuneytisins um breyting á reglum um einkunnagjöf
í Menntaskólanum á Akureyri.**

Menntamálaráðuneytið ritaði hinn 24. janúar 1968 skólameistara Menntaskólans á Akureyri bréf það, er hér fer á eftir, um breyting á reglum um einkunnagjöf í Menntaskólanum á Akureyri:

„Með vísun til bréfs starfandi skólameistara, dags. 12. þ. m., heimilar ráðuneytið hér með, að gerðar verði eftirtaldar breytingar á einkunnagjöf í Menntaskólanum á Akureyri:

1. Gefin verði sérstök einkunn í **efnafræði**, bæði við árspróf og stúdentspróf.
2. Sérstök einkunn í **verklegri eðlisfræði** falli niður, en prófað verði í verklegri eðlisfræði á stúdentsprófi eins og verið hefur.
3. Framangreind ákvæði taka til beggja greina stærðfræðideildar.
3. Í **náttúrufræðideild** þeirri, sem nú starfar í reynsluskyni, verði gefin sérstök einkunn í **lifefnafræði**.
4. Í þeirri deild verði ein einkunn í **stærðfræði**, sameiginleg fyrir munnlega og skriflega stærðfræði.

Breytingar þessar komi til framkvæmda vorið 1968 og gildi, unz öðru vísi kann að verða ákveðið.

Menntamálaráðuneytið, 24. janúar 1968.

Gylfi Þ. Gíslason.

Birgir Thorlacius.

JARÐRÆKTARSAMÞYKKT

fyrir Búnaðarsamband Austurlands.

I. KAFLI

Takmörk samþykktarsvæðis og markmið.

1. gr.

Búnaðarsamband Austurlands er eitt jarðræktarsamþykktarsvæði og heitir Ræktunarsamband Austurlands.

2. gr.

Ræktunarsamband Austurlands tekur að sér, á þann hátt, sem nánar er tekið fram í samþykkt þessari eftirgreind verkefni, er nái til allra jarða á samþykktarsvæðinu eftir því sem bezt á við á hverjum stað, að undanskildum þeim jörðum, er falla kunna undir ákvæði IV. kafla jarðræktarlaga nr. 22/1965:

1. Að ræsa fram land til túnræktar, beitiræktar og engjaræktar. Tekur framkvæmd verksins til fullnaðar framræslu á landinu að opnum skurðum, svo og lokræsum, þar sem þess er þörf.
2. Að framkvæma jarðvinnslu á túnnum jarða á samþykktarsvæðinu, sem ekki eru véltæk. Nær það til plægingar, herfingar og jöfnunar lands.

3. Að taka að sér jarðvinnslu til nýræktar túna og garða. Nær það til fullnaðarvinnslu á sama hátt og gert er ráð fyrir í síðustu málsgrein 2. tölul.
4. Að framkvæma sléttun engja, svo þær verði véltækar, hvort heldur það er gert með völtun, vinnslu lands, flóðgarðahleðslu eða öðrum aðferðum. Allar framkvæmdir skv. þessari grein, 1. til 4. lið skulu gerðar eftir fyrirsögn Búnarfélags Íslands.

II. KAFLI

Skipan og verksvið framkvæmdastjórnar.

3. gr.

Stjórnarnefndarmenn B. S. A. eru um leið stjórnendur ræktunarsambandsins. Kjörnir fulltrúar á aðalfundum B. S. A., mynda fulltrúaráð ræktunarsambandsins. Aðalfundur B. S. A. er jafnframt aðalfundur Ræktunarsambands Austurlands.

4. gr.

Stjórn ræktunarsambandsins annast kaup á nauðsynlegum vélum og verkfærum til skurða og lokræsagerðar, svo og á jarðvinnsluvélum en skylt er henni, sbr. 8. gr. laga um jarðræktar- og húsagerðarsamþykkt í sveitum, að hafa samráð við vélaneftnd ríkisins um kaup og val vélanna.

5. gr.

Stjórn ræktunarsambandsins sér um kaup á öllu því, er með þarf til reksturs og viðhalds þeim vélum og áhöldum, sem keypt verða. Henni ber að hafa þau tryggð fyrir fjárhæð, sem svarar til verðgildis þessara eigna, eins og þær eru á hverjum tíma.

6. gr.

Stjórn ræktunarsambandsins annast um allan rekstur vélanna, henni ber að gera og undirrita alla verktökusamninga við hina einstöku framkvæmdaraðila á samþykktarsvæðinu, og ákveða á hvaða tíma og í hverri röð verkefnin eru tekin, er unnið skal að.

7. gr.

Stjórn ræktunarsambandsins ræður starfsmenn, ákveður launakjör þeirra og hefur umsjón með öllum jarðræktarframkvæmdum. Stjórnin ræður framkvæmdastjóra til eins árs í senn og felur honum með erindisbréfi framkvæmdastjórn.

8. gr.

Allir þeir samningar, er framkvæmdastjórn gerir fyrir hönd ræktunarsambandsins skv. samþykktum þess eða ályktunum aðalfundar eru skuldbindandi fyrir félagsheildina, þótt þeir hafi ekki sérstaklega verið undir einstök búnaðarfélög þess bornir.

Framkvæmastjórn ber ábyrgð gerða sinna fyrir aðalfundi.

III. KAFLI

Um tilhögun framkvæmda.

9. gr.

Skylt er stjórnnum hreppabúnaðarfélaganna, hverri á sínu svæði að skrá verkbeiðnir félagsmanna fyrir lok janúarmánaðar ár hvert. Skal þar tilgreint hverra jarðabóta er óskað og hve mikilla á því ári, eftir því sem næst verður komið. Skýrslum þessum ber að skila til framkvæmdastjóra fyrir 1. febrúar ár hvert. Skýrslunni fylgi frá verkkaupendum greiðsluskuldbinding hvers þeirra fyrir sig,

og enn fremur yfirlýsing félagsstjórnar hreppabúnaðarfélagsins um það, að félagið takist á hendur ábyrgð á greiðslum félagsmanna sinna fyrir þau verk, er hjá þeim verða unnin á því starfsári.

10. gr.

Að fengnum þeim skýrslum, er um ræðir í 9. gr. ber framkvæmdastjórn að semja starfs- og rekstraráætlun fyrir yfirstandandi ár. Rísi ágreiningur innan ræktunarsambandsstjórnar um veigamikil atriði í framkvæmdaáætlun, ber að leggja hann fyrir næsta aðalfund ræktunarsambandsins til úrskurðar. Framkvæmdastjórn er skylt að framfylgja samþykktri starfsáætlun, svo sem við verður komið.

11. gr.

Við undirbúning framkvæmdaáætlunar sé þess sérstaklega gætt:

1. Að þær jarðir, sem minnst véltækt land hafa, sitji fyrir vinnu eftir því sem við verður komið, án þess að valda óhæfilegum aukakostnaði í flutningi véla og verkfæra.
2. Að túnrækt sé að öðru jöfnu látin sitja fyrir öðrum ræktunarframkvæmdum.
3. Að land það, er brjóta á til ræktunar hafi verið ræst fram á fullnægjandi hátt, að dómi trúnaðarmanns Búnaðarfélags Íslands.
4. Að framræsla bithaga í stærri sil komi að jafnaði því aðeins til greina að fullnægt hafi verið framræsluverkefnum vegna tún-, garð-, og engjaræktar á þann hátt, að það tefji eigi jarðvinnsluna, svo að því marki verði náð, að allur heyfengur verði tekinn á vélfæru landi.

IV. KAFLI

Um verðlagsákvarðanir og greiðslu kostnaðar.

12. gr.

Kostnaður við framkvæmdir, er í samþykkt þessari getur, greiðist á eftirfarandi hátt:

1. Sameiginleg framræsla fleiri jarða greiðist af þeim, er hagsmuna njóta af framkvæmdinni, eftir flatarmáli þess lands, er nýtur hags af verkinu. Þó skal taka tillit til þess, ef um einhverja sérstöðu er að ræða. Verði ágreiningur um þessi atriði skal úr honum skorið með mati tveggja óvilhallra dómkvaddra manna.
2. Framkvæmdir á einstökum jörðum skulu greiddar af verkkaupanda, eftir þeim skildaga, og á þann hátt, sem fram verður tekið í verktökusamning. Heimilt er stjórninni að láta greiðslur fara fram eftir áætludum verktöxtum meðan verkið stendur yfir ár hvert, en fullnaðargreiðsla sé byggð á tilkostnaðarverði, eins og það verður samkvæmt rekstrarreikningi hvers árs. Áætlaðir verktaxtar séu miðaðir við tímaeiningu.

13. gr.

Til reksturskostnaðar telst greiðsla vinnulauna, allur reksturskostnaður véla og greiðslur fyrningargjalds af þeim, kostnaður við flutninga þeirra milli vinnustaða, viðhald véla, er stafar af eðlilegu sliti þeirra, vaxtagreiðslur, kostnaður við verkstjórn og stjórnarkostnaður.

Heimilt er aðalfundi að ákveða og leggja á framkvæmdakostnað áhættubókun, er nemi allt að 5% af heildarrekstrarkostnaði hvers árs.

14. gr.

Aðalfundur ræktunarsambandsins getur heimilað framkvæmdastjórn að taka ákveðin verk sem tilgreind eru í 2. gr. þessarar samþykktar í ákvæðisvinnu, enda sé lögð fyrir aðalfund kostnaðaráætlun og verklýsing á því sem vinna á.

15. gr.

Heimilt er framkvæmdastjórn á þeim tíma, sem ekki er unnt að vinna að skurðgrefti, lokræsagerð eða jarðvinnslu fyrir samþykktaraðila að taka að sér verk fyrir búendur, hreppsfélög eða aðra aðila á sambandssvæðinu, þótt þau falli ekki undir ákvæði annarrar greinar, ef tryggt er, að það sé hagkvæmt fyrir ræktunarsambandið og samþykktarsvæðið, enda sé tryggt, að vélakostur sé ekki festur við þessi störf, svo að það brjóti í bága við hagsmuni samþykktaraðila.

16. gr.

Rekstrarafgangur og áhættubóknun, svo og ef ágóði verður af ákvæðisvinnu eða þeim verkum, er um getur í 15. gr. skal leggjast í stofnsjóð ræktunarsambandsins og varið skv. ákvæðum þeim, er um hann gilda sbr. 17. gr.

V. KAFLI

Fjáröflunar og tryggingar.

17. gr.

Ræktunarsambandið myndar stofnsjóð til vélakaupa. Fer upphæð stofnfjár eftir þörfum. Stofnfjár skal aflað þannig:

1. Hreppabúnaðarfélagin á samþykktarsvæðinu leggja fram sem óafturkræft framlag upphæð er nemur hið minnsta $\frac{1}{4}$ hluta alls stofnfjárins samkvæmt 1.—4. lið.
2. Í stofnsjóð renna óafturkræf frjáls fjárframlög frá einstaklingum eða öðrum aðilum.
3. Með sameiginlegu stofnláni, sem tryggt er með sameiginlegri ábyrgð ræktunarsambandsins.
4. Framlög úr ríkissjóði til vélakaupa renna í stofnsjóð jafnóðum og þau greiðast. Árlegar tekjur stofnsjóðs eru:
 - a. Tekjur þær, sem inn koma samkvæmt ákvæðum 16. gr.
 - b. Vaxtatekjur og aðrar tekjur, er til sjóðsins kunna að falla.

18. gr.

Stofnfjárframlög hreppabúnaðarfélaga greiðist inn til framkvæmdastjórnar, þá er samþykkt hefur öðlazzt gildi. Framlag hvers hreppabúnaðarfélags skal greitt í hlutföllum við fasteignamat lands og ræktunarlóða. Þó skal hver verðeining ræktunarlóða aðeins bera hálfan gjaldþunga móti einingu í öðru landverði.

19. gr.

Komi í ljós síðar að auka þurfi stofnsjóð, að áliti framkvæmdastjórnar ber henni að gera rökstuddar tillögur um stofnfjáraukningu til stjórna búnaðarfélaganna á sambandssvæðinu, en þær leggja fyrir almennan fund í félagunum til samþykktar. Að fenginni meirihluta samþykkt í búnaðarfélagunum skal tillagan borin upp á aðalfundi ræktunarsambandsins. Verði hún samþykkt þar með meiri hluta atkvæða, er hún bindandi fyrir hreppabúnaðarfélagin.

20. gr.

Heimilt er framkvæmdastjórn að taka reksturslán gegn tryggingum í því jarðræktarframlagi, er á umbætur verður greitt úr ríkissjóði, samkvæmt II. og III. kafla jarðræktarlagla.

21. gr.

Skyll er samþykktaraðilum að hafa greitt framkvæmdastjórn $\frac{3}{4}$ af áætluðu kostnaðarverði að frádregnu væntanlegu jarðabótaframlagi þeirrar vinnu, er þeir hafa pantað, áður en verkið er hafið. Eftirstöðvarnar greiðast á gjalddaga, er verk-tökusamningur ákveður.

VI. KAFLI

Um reikningshald, endurskoðun og yfirstjórn fjármála.

22. gr.

Reikningsár ræktunarsambandsins er almanaksárið. Reikningsskilum skal lokið svo tímanlega, að endurskoðun hafi farið fram áður en aðalfundur ræktunarsambandsins er haldinn. Skulu endurskoðendur sannprófa, að reikningum beri saman við bækur framkvæmdastjórnar.

23. gr.

Endurskoðendur séu tveir, kjörnir á aðalfundi ræktunarsambandsins til eins árs í senn. Þeir skulu kynna sér reikninga sem bezt og hafa eftirlit með starf-rækslu framkvæmdastjórnar í hvívetna.

24. gr.

Endurskoðaðir reikningar skulu lagðir fram til samþykktar á aðalfundi ræktunarsambandsins. Þar gefur framkvæmdastjórn skýrslu um starfsemina, svo og endurskoðendur ef tilefni er til þess.

VII. KAFLI

Um breyting samþykktar og hvernig samþykkt verði úr gildi felld.

25. gr.

Tillögur, er fram kunna að koma til breytinga á samþykkt þessari frá hreppa-búnaðarfélögum eða framkvæmdastjórn, skulu sendar stjórn Búnaðarsambands Austurlands, er sendir þær til allra búnaðarfélaga á sambandssvæðinu til umsagnar. Þær skulu síðan lagðar fyrir aðalfund búnaðarsambandsins. Samþykki löglegur aðalfundur breytingarnar með að minnsta kosti $\frac{3}{5}$ atkvæðisbærra fulltrúa, skal stjórn sambandsins senda breytingarnar Búnaðarfélagi Íslands, er leitar staðfestingar landbúnaðarráðherra á þeim.

26. gr.

Samþykkt þessa má því aðeins nema úr gildi, að rökstutt álit meiri hluta samþykktaraðila liggi fyrir um það, að tilgangi samþykktar verði ekki náð og lög-mætur aðalfundur búnaðarsambandsins samþykki það með að minnsta kosti $\frac{3}{5}$ atkvæðisbærra fundarmanna, enda komi samþykki landbúnaðarráðherra til.

27. gr.

Með brot á samþykkt þessari skal farið að hætti opinberra mála. Geta þau varðað sektum frá 100—5000 krónum, nema þyngri hegning liggi við að lögum.

Samþykkt þessi staðfestist hér með samkvæmt lögum nr. 7 1945, um jarðræktar- og húsagerðarsamþykktir í sveitum, til þess að öðlast gildi þegar í stað.

Lanbúnaðarráðuneytið, 24. janúar 1968.

Ingólfur Jónsson.

Þorv. K. Þorsteinsson.